



Na osnovu člana 25. stav (1) tačka a) Zakona o konkurenciji ("Službeni glasnik BiH", br. 48/05, 76/07 i 80/09) Konkurencijsko vijeće na 104.sjednici održanoj dana 23.03.2010. godine, je donijelo

ODLUKU

**O NAČINU PODNOŠENJA PRIJAVE I KRITERIJUMIMA ZA OCJENU
KONCENTRACIJA PRIVREDNIH SUBJEKATA**

I OPŠTE ODREDBE

**Član 1.
(Predmet)**

Ovom Odlukom se određuju podnosioci prijave namjere koncentracije privrednih subjekata, način podnošenja, sadržaj i oblik prijave, dokumentacija i podaci koji se dostavljaju uz prijavu, oblik i sadržaj obavijesti o sticanju dionica ili udjela u privrednim subjektima te kriterijumi za ocjenu dopuštenosti koncentracije privrednih subjekata u postupcima koje vodi Konkurencijsko vijeće prema odredbama Zakona o konkurenciji (u daljem tekstu: Zakon).

II PODNOŠENJE PRIJAVE

**Član 2.
(Obaveza prijave koncentracije)**

Namjeravanu koncentraciju privrednih subjekata iz člana 12. Zakona, učesnici koncentracije su obavezni prijaviti i to :

- a) privredni subjekti sa sjedištem i prebivalištem u inostranstvu ukoliko su ispunjeni uslovi iz člana 14. tačke a) i b) Zakona, i
- b) privredni subjekti sa sjedištem i prebivalištem u Bosni i Hercegovini ukoliko su ispunjeni uslovi iz člana 14. tačka b) Zakona.

**Član 3.
(Podnosilac prijave)**

- (1) Obavezu podnošenja prijave, uz ispunjene uslove iz člana 14. Zakona, ima:
 - a) preuzimač kod pripajanja privrednih subjekata odnosno zajednički privredni subjekti koji učestvuju u spajanju;
 - b) sticatelj kontrole ili dominantnog uticaja jednog, odnosno više privrednih subjekata (sticatelji) nad drugim, odnosno nad više drugih privrednih subjekata ili dijelom drugog privrednog subjekta, odnosno dijelovima drugih privrednih subjekata;
 - c) sticatelj većine dionica ili udjela ili većine prava glasa, ili na drugi način u skladu sa odredbama Zakona;
 - d) svi učesnici u zajedničkom ulaganju na dugoročnoj osnovi ili učesnik u zajedničkom ulaganju kojeg su ostali učesnici odredili kao svog zajedničkog

- predstavnik, kod stvaranja zajedničkog ulaganja na dugoročnoj osnovi (*joint venture*);
- e) ponudilac, kod sticanja kontrole ili dominantnog uticaja na osnovu javne ponude (naročito na način da se stiče većina dionica ili udjela ili većina prava glasa).
- (2) Obavezu podnošenja prijave imaju svi učesnici u koncentraciji, u slučajevima koji nisu obuhvaćeni stavom (1) ovog člana, koji podnose zajedničku prijavu ili je podnosi učesnik kojeg su ostali učesnici u koncentraciji odredili kao svog zajedničkog predstavnika.

Član 4. **(Rok za podnošenje prijave)**

- (1) Privredni subjekti učesnici koncentracije su obavezni Konkurencijskom vijeću prijaviti namjeru provođenja koncentracije na način propisan ovom Odlukom, u roku ne dužem od 15 dana od dana zaključivanja ugovora / sporazuma, objavljivanja javne ponude dionica ili sticanja kontrole, zavisno od toga šta nastupi ranije, u smislu člana 16. stav (1) Zakona.
- (2) Prijava koncentracije može se podnijeti Konkurencijskom vijeću i kada učesnici koncentracije dokažu svoju namjeru za koncentracijom zaključenim načelnim sporazumom, memorandumom o razumijevanju, pismom namjere ili javnim objavljivanjem namjere za ponudu kupovine.

III OBLIK PRIJAVE

Član 5. **(Oblik i način popunjavanja prijave)**

- (1) Uz prijavu, podnesenu u pisanom obliku na papiru formata A4, dostavlja se i prijava u elektronskom obliku, kao i njeni prilozi .
- (2) Podnosilac prijave popunjava prijavu, na sljedeći način:
- a) svaki podatak naveden u članu 8. i 9. ove Odluke mora biti upisan na posebnom listu, uz mogućnost da se doda onoliko listova koliko je potrebno da se taj podatak detaljno i potpuno izloži;
 - b) redni broj i tačan naziv svakog podatka, prema redoslijedu kako su ti podaci navedeni u članu 8. i 9. ove Odluke, upisuje se na vrhu lista;
 - c) ispod broja i naziva podatka:
 - upisuje podatke, odnosno daje detaljan i potpun opis okolnosti koje se odnose na prijavljenu koncentraciju;
 - upisuje da podatak nije relevantan za ocjenu prijavljene koncentracije i navodi razloge za to;
 - u slučajevima iz člana 14. stav (2) ove Odluke navodi od koga je i kada podatke pokušao pribaviti, razloge zbog kojih podatke nije mogao prikupiti i gdje bi Konkurencijsko vijeće trebala pribaviti nedostajuće podatke.
 - d) iza teksta koji se odnosi na pojedini podatak navodi dokaze, analize, dijagrame ili druge dokumente kojima se dokazuju navodi uz pojedinu tačku, a koji se dostavljaju u prilogu prijave;

- e) prema potrebi navodi i druge podatke i opise za koje smatra da bi mogli pomoći Konkurencijskom vijeću pri donošenju ocjene prijavljene koncentracije;
- f) na kraju prijave na posebnom listu upisuje »Dodaci uz prijavu«, gdje se nabrajaju sva dokumenta, pisani dokazi, analize i dijagrami koje prilaže uz prijavu.

Član 6. (Dokazi)

Podnosilac prijave dužan je pribaviti i dostaviti sve podatke, isprave i dokaze potrebne za ocjenu dopuštenosti prijavljene koncentracije u smislu odredaba Zakona i ove Odluke.

Član 7. (Jezik prijave i broj primjeraka)

- (1) Prijava, dodaci i druga dokumentacija koja se dostavlja uz prijavu podnose se na jednom od službenih jezika koji su u upotrebi u Bosni i Hercegovini i u jednom primjerku.
- (2) Ukoliko je original prijave, priloga uz prijavu ili dokumentacija koja se dostavlja uz prijavu na stranom jeziku, podnosilac prijave obavezan je, uz original ili ovjerenu kopiju originala, dostaviti i njen ovjereni prevod na jednom od službenih jezika koji su u upotrebi u Bosni i Hercegovini.
- (3) Konkurencijsko vijeće u određenim slučajevima može zatražiti da se uz original prijave i priloga dostavi i jedna ili više kopija cijele prijave i svih priloga koji ne moraju biti ovjereni.

Član 8. (Istinitost podataka i poslovna tajna)

- (1) Podaci navedeni u prijavi moraju biti istiniti i potpuni.
- (2) Podnosilac prijave uz svaki podatak u prijavi, kao i uz priloge i druge dokaze je dužan jasno označiti podatke na koje se primjenjuju odredbe o poslovnoj tajni iz člana 38. stav (2) Zakona.
- (3) Poslovnom tajnom neće se smatrati podaci koji u prijavi ne budu označeni na način opisan u stavu (2) ovog člana, kao i svi oni podaci koji su u prijavi označeni kao tajni ili povjerljivi u smislu stava (2) ovoga člana, a za koje je Konkurencijsko vijeće utvrdilo da su na bilo koji način već objavljeni ili poznati javnosti.

IV SADRŽAJ PRIJAVE

Član 9. (Obavezni sadržaj prijave)

Prijava mora sadržavati sljedeće podatke:

- a) ime (ili naziv privrednog subjekta) sjedište i predmet poslovanja podnosioca prijave;

- b) ime (ili naziv privrednog subjekta), sjedište i predmet poslovanja svih učesnika koncentracije;
- c) ime i ovlaštenja zastupnika ili ovlaštene osobe koja podnosi prijavu kao predstavnik podnosioca prijave;
- d) ime, adresu, broj telefona, broj telefaksa i e-mail adresu osobe koju je podnosilac prijave odredio kao osobu zaduženu za kontakte i saradnju sa Konkurencijskim vijećem, ako je riječ o osobi različitoj od osobe koja podnosi prijavu;
- e) detaljan opis pravnog oblika koncentracije;
- f) pravni osnov koncentracije (naziv dokumenta, poslovni broj, ime ili kompaniju stranaka u konkretnom pravnom poslu, mjesto i datum sklapanja pravnog posla), na primjer:
 - ugovor /sporazum o spajanju;
 - ugovor /sporazum o pripajanju ili odgovarajuće odluke organa privrednih subjekata;
 - načelni ugovor / sporazum o spajanju ili pripajanju;
 - memorandum o razumijevanju;
 - pismo namjere potpisano od svih učesnika koncentracije;
 - ugovor /sporazum kojim se stiču dionice ili udjeli;
 - ugovor /sporazum o vođenju poslova;
 - ugovor /sporazum o prenosu dobiti;
 - odluka o izmjeni statuta, odluka (ili ugovor) o osnivanju privrednog subjekta ili koji drugi akt koji nekom od učesnika daje dominantan uticaj;
 - ugovor /sporazum o zakupu imovine koji nekom od učesnika daje dominantan uticaj;
 - javna ponuda za preuzimanje;
 - javna objava namjere za ponudu kupovine dionica;
 - ugovor /sporazum o zajedničkom ulaganju.
- g) godišnji finansijski izvještaj za godinu koja je prethodila koncentraciji (bilans stanja i bilans uspjeha, izvještaj o dobiti/gubitku, o novčanim tokovima, o promjeni glavnice, računovodstvene politike i bilješke uz finansijske izvještaje, podaci o visini uplaćenih premija za osiguravajuća društava) kao i druge izvještaje iz kojih je vidljivo finansijsko stanje učesnika koncentracije;
- h) ukupan godišnji prihod (poslovni prihodi, finansijski prihodi, vanredni i ostali prihodi) učesnika koncentracije nakon odbijenog poreza na dodanu vrijednost, drugih poreza koji se direktno odnose na promet i rabat, u smislu člana 14 i 15. Zakona, iskazan posebno za svakog učesnika koncentracije:
 - na svjetskom nivou;
 - na tržištu Bosne i Hercegovine.
- i) utvrđivanje relevantnog tržišta na kojem djeluju učesnici koncentracije i privredni subjekti pod njihovom kontrolom ili privredni subjekti koji ih kontrolišu i procjena njihovih tržišnih udjela, prije i nakon provođenja koncentracije;
- j) popis i procjenu tržišnih udjela glavnih tržišnih konkurenata učesnika koncentracije na relevantnom tržištu;

- k) strukturu posjednika dionica i/ili udjela u privrednom subjektu nad kojim se stiče kontrola odnosno dominantan uticaj, prije i nakon provođenja koncentracije (izražena u postotcima);
- l) popis drugih privrednih subjekata na relevantnom tržištu u kojima učesnici koncentracije pojedinačno ili zajedno imaju 10% ili više udjela odnosno 10% ili više prava glasa, uz kratki opis osnovne djelatnosti tih privrednih subjekata (povezana društva);
- m) popis svih privrednih subjekata na relevantnom tržištu u kojima su članovi uprave ili nadzornog odbora učesnika koncentracije istovremeno članovi uprave ili nadzornog odbora, uz kratak opis osnovne djelatnosti tih privrednih subjekata;
- n) navođenje drugih tijela ovlaštenih za ocjenu koncentracija izvan teritorije Bosne i Hercegovine kojima je podnesen zahtjev za ocjenu iste koncentracije ili postoji namjera za podnošenje takve prijave;
- o) detaljan opis organizacije mreže distribucije i maloprodaje proizvoda i/ili usluga na relevantnom tržištu, sa posebnim opisom mreže distribucije i maloprodaje koju koriste učesnici koncentracije (vlastita, ugovorna i sl.);
- p) opis izvršenih ili namjeravanih istraživanja i ulaganja u razvoj učesnika koncentracije (oblik i vrsta ulaganja ili istraživanja, njihovo značenje za proizvodnju i promet proizvoda i/ili usluga na relevantnom tržištu, iznos sredstava koja su u tu svrhu uložena ili se namjeravaju uložiti i sl.);
- r) razloge kojima se koncentracija pravno i ekonomski obrazlaže;
- s) opis i detaljno obrazloženje očekivanih pogodnosti koje će nastati provedbom koncentracije sa stanovišta interesa potrošača kao što su naročito:
 - snižavanje cijena proizvoda i/ili usluga;
 - povećanje kvaliteta proizvoda i/ili usluga;
 - uvođenje inovacija;
 - povećanje i proširivanje mogućnosti izbora proizvoda i/ili usluga za potrošača;
- t) potpis osobe koja je odgovorna za tačnost i istinitost podataka u prijavi;
- u) mjesto i datum podnošenja prijave.

Član 10. (Drugi podaci u prijavi)

- (1) Konkurencijsko vijeće može tražiti i dostavljanje i drugih podataka, osim navedenih u članu 9. ove Odluke, za koje smatra da bi joj mogli pomoći pri ocjeni koncentracije, a naročito:
 - a) podatke o broju zaposlenih u privrednim subjektima učesnicima koncentracije i broju zaposlenih u svim privrednim subjektima članovima koncerna čiji su članovi učesnici koncentracije;
 - b) listu pet najvećih dobavljača i/ili pet najvećih kupaca svakog od učesnika koncentracije, uključujući vrijednost nabavke;
 - c) podatke o vrijednosti i obimu prodaje izražene u konvertibilnim markama

odnosno broju komada ili mjernih jedinica koju su učesnici koncentracije ostvarili prodajom proizvoda i/ili usluga na relevantnom tržištu.

(2) Podaci iz stava (1) ovog člana dostavljaju se za godinu, koja je prethodila koncentraciji.

Član 11. (Obavezni dodaci uz prijavu)

Podnosilac prijave, dužan je uz prijavu dostaviti primjerak originala ili ovjerene kopije određenih dokumenata /isprava i druge pisane dokaze, a naročito:

- a) izvod iz registra suda ili drugog registra iz kojeg su vidljivi podaci o kompaniji, sjedištu i predmetu poslovanja podnosioca prijave;
- b) izvod iz registra suda ili drugog registra iz kojeg su vidljivi podaci o kompaniji, sjedištu i predmetu poslovanja svih učesnika koncentracije;
- c) punovažnu punomoć ako se prijava podnosi preko ovlaštene osobe;
- d) primjerak originala ili ovjerene kopije pravne osnove koncentracije iz člana 8. ove Odluke, uz ovjereni prevod na jednom od službenih jezika koji su u upotrebi u Bosni i Hercegovini, ukoliko je original na stranom jeziku.
- e) osnovne godišnje finansijske izvještaje za učesnike koncentracije za finansijsku godinu koja je prethodila koncentraciji, sa podacima o ukupnom prihodu svih privrednih subjekata učesnika koncentracije ostvaren prodajom proizvoda i/ili usluga, nakon odbijenog poreza na dodanu vrijednost, drugih poreza koji se direktno odnose na promet i rabat:
 - na svjetskom nivou;
 - na tržištu Bosne i Hercegovine.
- f) sve raspoložive analize, studije, prikaze ili druge izvještaje pripremljena za bilo kojeg člana uprave, nadzornog odbora ili predsjednika i/ili članove skupštine dioničara čiji je predmet procjena i analiza koncentracije sa stanovišta stanja tržišne konkurencije, uslova i postojanja stvarnih i potencijalnih tržišnih konkurenata na relevantnom tržištu;
- g) grafički prikaz (dijagram) organizacijske strukture učesnika koncentracije i povezanih društava iz kojeg su jasno vidljivi:
 - međusobne veze između učesnika koncentracije i povezanih društava;
 - udjeli koje vladajuća društva imaju u osnovnom kapitalu zavisnih društava odnosno koje društva kćeri imaju u drugim društvima kćerima unutar grupe odnosno koncerna (izražena u postocima).
- h) izvještaj uprave kojim se pravno i ekonomski obrazlaže koncentracija;
- i) odluke drugih tijela ovlaštenih za ocjenu koncentracija izvan teritorije Bosne i Hercegovine (ukoliko je već ista donesena) ili dužan je navesti da li je podnio ili će podnijeti zahtjev za ocjenu iste koncentracije;
- j) potvrda o plaćenju administrativnoj taksi (Odluka o administrativnim taksama u vezi sa procesnim radnjama pred Konkurencijskim vijećem - "Službeni glasnik BiH", broj 30/06).

Član 12.
(Drugi dodaci uz prijavu)

Konkurencijsko vijeće, uz priloge navedene u članu 10. ove Odluke može zatražiti podatke koje smatra korisnim pri ocjeni prijavljene koncentracije, a naročito:

- a) osnovne godišnje finansijske izvještaje za učesnike koncentracije za tri uzastopne finansijske godine koje su prethodile koncentraciji sa podacima o ukupnom prihodu svih privrednih subjekata učesnika koncentracije ostvaren prodajom proizvoda i/ili usluga, nakon odbijenog poreza na dodanu vrijednost, drugih poreza koji se direktno odnose na promet i rabat:
 - na svjetskom nivou;
 - na tržištu Bosne i Hercegovine.
- b) vrijednost i obim proizvodnje i/ili prodaje, izražene u konvertibilnim markama, odnosno broju komada ili mjernih jedinica, koju su učesnici koncentracije ostvarili prodajom proizvoda i/ili usluga na relevantnom tržištu u tri uzastopne godine, koje su prethodile koncentraciji.

V ODREDBE ZA SLUČAJEVE STICANJA DIONICA ILI UDJELA U BANKAMA, OSIGURAVAJUĆIM DRUŠTVIMA I DRUGIM FINANSIJSKIM INSTITUCIJAMA

Član 13.
(Oblik i sadržaj obavještenja)

- (1) Banke, osiguravajuća društva i druge finansijske institucije, u slučajevima iz člana 12. stav (3) Zakona, dužne su obavijestiti u pisanom obliku o sticanju dionica ili udjela u drugim privrednim subjektima do kojeg je došlo u redovnom poslovanju tih institucija koje uključuje promet i posredovanje vrijednosnim papirima za vlastiti račun ili za račun trećih osoba (u daljem tekstu: podnosilac obavještenja).
- (2) Pisano obavještenje naročito sadrži sljedeće podatke:
 - a) kompaniju i sjedište podnosioca obavještenja;
 - b) kompaniju, sjedište i predmet poslovanja odnosno ime i boravište osobe za koju je podnosilac obavještenja stekao dionice ili udjele;
 - c) kompaniju, sjedište i predmet poslovanja privrednih subjekata čije je dionice ili udjele podnosilac obavještenja stekao;
 - d) dioničku strukturu odnosno strukturu poslovnih udjela privrednih subjekata čije je dionice ili poslovne udjele podnosilac obavještenja stekao (nakon sticanja);
 - e) rok u kojem podnosilac obavještenja namjerava prodati stečene dionice ili udjele.
- (3) Uz pisano obavještenje se dostavlja:
 - a) izjava podnosioca obavještenja da stečene dionice ili udjele drže privremeno s namjerom njihove daljnje prodaje;
 - b) izjava podnosioca obavještenja da se stečenim dionicama ili poslovnim udjelima neće koristiti na način koji bi mu omogućavao bilo kakav uticaj na konkurentno ponašanje privrednih subjekata čije je dionice ili poslovne udjele stekao;

- c) izjava podnosioca obavještenja da pravo glasa ostvaruje samo u svrhu pripreme prodaje cijelog privrednog subjekta čije je dionice ili poslovne udjele stekao ili prodaje dijela tog privrednog subjekta (u slučaju da ostvaruje pravo glasa);
- d) izjava podnosioca obavjesti da prava koja proizlaze iz stečenih dionica ili udjela neće koristiti na način da na bilo koji način narušava, ograničava ili sprečava tržišnu konkurenciju niti će poduzimati bilo kakve mjere u tom pravcu.

Član 14.
(Zahtjev za produženje roka)

- (1) Podnosilac obavještenja zahtjev za produženje roka, iz člana 12. stav (3) tačka a) Zakona, mora podnijeti najkasnije petnaest (15) dana prije isteka roka koji je naveo u obavještenju (član 12. stav (2) tačka e) ove Odluke).
- (2) Zahtjev se podnosi u pisanom obliku i sadrži:
 - a) razloge zbog kojih se prodaja dionica ili udjela nije mogla obaviti u utvrđenom roku;
 - b) razdoblje za koje se traži produženje roka u kojem će prodaja biti obavljena koje ne može biti duže od šest (6) mjeseci.
- (3) Konkurencijsko vijeće će donijeti poseban zaključak na dostavljeni zahtjev za produženje roka.

VI PROVJERA PRIJAVE KONCENTRACIJE

Član 15.
(Provjera potpunosti prijave)

- (1) Konkurencijsko vijeće nakon prijema prijave utvrđuje je li prijava podnesena od ovlaštene osobe, da li sadrži propisane podatke i priloge, ovjerenost kopija i prevode na jednom od službenih jezika Bosne i Hercegovine.
- (2) U slučaju da podnosilac prijave, iz opravdanih razloga i unatoč učinjenim nastojanjima, nije u mogućnosti pribaviti neki od podataka ili dokumenata obaveznog sadržaja prijave, to će pisano utvrditi na odgovarajućem mjestu u prijavi uz navođenje:
 - a) od koga je i kada podatke ili dokumente pokušao pribaviti;
 - b) razloge iz kojih podatke ili dokumente nije mogao prikupiti;
 - c) gdje bi Konkurencijsko vijeće trebalo pribaviti nedostajuće podatke ili dokumente.
- (3) Konkurencijsko vijeće, u slučaju opisanom u stavu (2) ovog člana, može od podnosioca prijave zatražiti da umjesto nedostajućih podataka u pisanom obliku dostavi vlastite analize i procjene stanja i situacija na koje se nedostajući podaci odnose.
- (4) Prijava koncentracije sa svim podacima navedenim u članu 8. ove Odluke i odgovarajućim dodacima iz člana 10. ove Odluke smatrat će se potpunom prijavom.

Član 16.
(Potvrda o podnesenoj prijavi)

(1) Kada utvrdi da je prijava potpuna, Konkurencijsko vijeće izdat će podnosiocu prijave potvrdu, u smislu člana 30. stav (3) Zakona.

(2) Potvrda iz stava (1) ovoga člana naročito sadrži:

- a) broj i datum izdavanja potvrde;
- b) naziv privrednog subjekta ili ime podnosioca prijave, odnosno ovlaštene osobe;
- c) nazive privrednih subjekata učesnika koncentracije;
- d) dan dostavljanja prijave Konkurencijskom vijeću;
- e) uputstvo da se, u smislu člana 18. stav (9) Zakona, koncentracija neće moći provesti prije donošenja rješenja Konkurencijskog vijeća kojim se koncentracija potvrđuje usklađenom sa članom 12. i 14. Zakona;
- f) uputstvo da počinje teći rok na osnovu člana 18. i 41. Zakona;
- g) potpis predsjednika Konkurencijskog vijeća.

VII KRITERIJUMI ZA OCJENU KONCENTRACIJE

Član 17.

(Kriterijumi ocjene koncentracije)

Konkurencijsko vijeće prilikom procjene namjeravane koncentracije primarno analizira efekte koji za posljedicu imaju značajno narušavanje tržišne konkurencije.

VIII RJEŠENJE O KONCENTRACIJI

Član 18.

(Rješenje o koncentraciji)

U slučaju kada Konkurencijsko vijeće u roku od 30 dana u skladu sa članom 18. stav (5) Zakona, od dana izdavanja potvrde ne donese Zaključak o pokretanju postupka ocjene koncentracije, smatrat će se da je koncentracija dopuštena.

Član 19.

(Rješenje na zahtjev)

U slučaju kada nije doneseno rješenje po prijavi namjere koncentracije u rokovima iz člana 18. stav (5) i člana 41. Zakona, na zahtjev podnosioca prijave Konkurencijsko vijeće donijet će rješenje o dopuštenosti koncentracije.

IX ZAVRŠNE ODREDBE

Član 20.

(Domet primjene)

Ova Odluka se primjenjuje na sve koncentracije utvrđene članom 12. Zakona.

Član 21.

(Prestanak važenja ranije Odluke)

Danom stupanja na snagu ove Odluke prestaje važiti Odluka o načinu podnošenja prijave i kriterij~~umi~~u za ocjenu koncentracija privrednih subjekata («Službeni glasnik BiH», broj 95/06)

Član 22.
(Objava i stupanje na snagu)

Ova Odluka stupa na snagu osmog dana od dana objavljivanja u »Službenom glasniku BiH«, a objavit će se i službenim glasilima entiteta i Brčko Distrikta Bosne i Hercegovine.

K.V.broj:01-01-50-180-I/10

Sarajevo, 23. mart 2010. godine

Predsjednik

dr Stjepo Pranjić